



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 8

CM Sarma-i Majuli-Jorhat apu yangluba mapa tenzüksü

Omicron mechi senzüsempongtsü nokdangba agientsüla: Ramaphosa



VOL. XIX NO. 53 (ADOK 53) DIMAPUR SANGTENNÜ (TUESDAY) YIMPOKSÜI (NOVEMBER) 30, 2021 ₹ 5.00

Nagaland Statehood Day sentong live sayutsü

Dimapur, November 29, 2021 (TYO): December 1, 2021 nü 59 buba Statehood Day benjung amongba MyGovNagaland indang YouTube Channel nung live sayutsü ta Home Department-i metetdaksü.

Iba sentong ya anepdang 8:45 ako nungi Nagaland Civil Secretariat

Plaza, Kohima nung agitsü. Tejan grarte mi MyGovNagaland Page nung YouTube aser Facebook nung onhttps://www.youtube.com/channel/UCYpIWIak_KPBdqVToVHmB6g/live ajanga repringtsü akok ta Home Department-i ashi.

COVID-19 Nagaland: 9 dak putet & 3 anep

Kohima, November 29, 2021 (TYO): Nagaland nung Hombarnü nisung 9 dak COVID-19 putet aser nisung 3 taneptsü angu.

"Tanü putetertemji Dimapur nung nisung 6 aser Kiphire, Kohima o Mokochung nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Taoba ghonda 24 tsüingda Dimapur nung COVID-19 agi shiranger nisung 3 taneptsü angu. Nisung 32,109 nungi 30,210 taneptsü nguogo aser ibaji 94.08% lir, ta pai ashi.

Tang nisung 140 anepaludar saka parnok 104 dakbo shirangba yimya kecha mali, ta paisa shisem.

"Deobar tashi nung nisung 737,483 nem COVID-19 vaccine indang dose 12,82,835 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,979, healthcare workers 15,999, arishi küm 45 ser temapur 208,818 aser arishi küm 18 nungi 44 tsüingda alir 451,687 lir" ta paisa ashi.

"Vaccine agirtem rongnungi nisung 545,352-i dose anaprong agiogo. Parnokji frontline workers 48,482, healthcare workers 13,508, arishi küm 45 ser temapur 172,378 aser arishi küm 18 nungi 44 tsüingda alir 310,984 lir" ta Dr Thurr-isa metetdaksü.

COVID-19 SOPs akangshir Hornbill Festival amongtsü

Kohima, November 29, 2021 (TYO): Omicron menatepba osangtem aliba atema kümdangshia Nagaland-i Hornbill Festival amongtsü atema sentong jungjunga renema lir, ta Tourism Advisor, Khehovi Yeputhomi-i ashi.

"Nagaland sorkari Covid-19 SOPs akangkanga benshia Tourism aser department tem aser ano state nung alirtem den yaritepa 22 buba Hornbill Festival amongtsü" ta Yeputhomi-i metetdaksü.

COVID-19 indang variant tasen "Omicron" prokshiba ajanga Mongulbarnü SOPs tasen agütsüshitsü ta paisa ashi.

"Anogo 10 nü benjungmong nung Naga kin 17 nungi yartsüingsangertemi shilem agitsü. Assam aser Nagaland Governor

Prof Jagdish Mukhi-i benjung lapoktsütsü aser Bodbar nikongdang 4:00 ako nung benjung lapokba sentong atema Chief Host ji Chief Minister Neiphui Rio asütsü" ta Advisor Yeputhomi-i metetdaksü.

"Taküm benjung nung tetushi süa jaoker nisung asem alitsü. Parnokji Ambassador of Israel to India, Consul General of United States aser Consul General Germany to India lir, ta paisa ashi.

Mon district kübok Longwa yim nungi Festival Father asütsü aser Tuensang district kübok Yimchunger nung Shampur yim nungi Tribal Guest aser Head Gaon Burah (village chieftain)-i sobaliba temoatsü meshitsü.

22 buba Hornbill Festival amongtsü atema Rs 5 crore lemkütsüogo, ta paisa shisem.

AASU tanishir ka tepset; Assam CM-i merenshitsü nangzük

Guwahati, November 29, 2021 (Agencies): All Assam Students' Union tanishir ka tepsetertem ozüing tapet agi merenshitsü ta Assam chief minister Himanta Biswa Sarma-i nangzükogo.

"Iba mapa nung shilem agirtem aputsü aser merenshitsü" ta pai ashi.

Hombarnü Jorhat nung AASU tanishir arishi küm 23 tain Animesh

Bhuyan telok kati tepset. Gari lendong ka nung nisung ka yiruba sülen iba lendong atalok ta osang angazükier.

Iba mapang nisung telok kati ASSU tanishir Animesh Bhuyan aser journalist Mridusmanta Baruah dak azükba indang video ka social media nung prokshioogo.

(Maneni tapak 2 nung...)

TENANGZÜKBA

Ni, Wb. Kilang Ling (Kilangmeren Walling, Nokpu Village), Dimapur, ni 11th Nov. 2021 anepdang Kisama nung Aor Arju onoki rongtsü, ta social media nung koba zülua prokshioogo, ibaji ni mashimalu ajanga prokshiba ta tanü Nov. 29, 2021 anogo Ao Senden tsüingdang nangzükier.

Tarutsü nung iba keno dak sentakba nung kechi khuret arudir ajakji ni arema abentsü nangzükier.

(Kilang Ling) 29/11/2021

Kulisür:

1. B. NUNGSANG (RIGER) 2. PURNUSHI Walling

Naga yimten tebilemstsü aser ali kibur ken o ajanga merenloker: CM Rio

Kohima, November 29, 2021 (TYO): North East nung state tejentiba rongnung Assam sülen tanabuba süaka Naga yimten tebilemstsü aser ali kibur indang ken o tem aliba ajanga Nagaland-i tanga state tem memeneper, ta Chief Minister Neiphui Rio-i ashi.

"Nagaland nung item khuret aliba ajanga infrastructure development aser talisa gari lenmang aser tanga terenlok maparen meinyaketer" ta pai ashi.

Secretariat lenmang nung Sanuoru ayong temdanga yangluba apu lapoktsüing Chief Minister Rio-i iba olen jembü.

Iba ya Nagaland nung mezüngbuba 'four-lane arch bridge' lir aser PWD department-i Vilelie Khamo aser KC Angami na den yaritepa yanglu.

Tanga state tem ama masü saka Nagaland nung ali ya kibur meyong aser sorkari akokba tashi ali kiburtem den jembir, mesüzükier mesüra temenok agütsü ta Rio-i

metetdaksü. "Nagaland renloksü atema ali kiburtemi sorkar nem ali bendanga agütsütsüla mesüra asenoki tanga state tem memeneptsü. Nenok akhümsübuttsü tim tsübuttsü saka sorkari inyakba mapa nung tetsükdaksü magütsütsüla" ta paisa ashi.

State Civil Secretariat den sendaktepba gari lenmang aser apu ya kanga nüngdaka liasü. Iba mapa inyaktetba atema Department, contractor tem aser ali kiburtemi nem tenüingsang agütsü, ta paisa ashi.

2015 küm July aser August ita mapang Sanuoru ayong nung jana ajanga Cross Drain (Culvert) tangbang aser iba jagi ali totoktsüsa akümba ajanga Capital Complex-i gari lenmang shibang.

Department-i iba ayong anasa Sub-way ka yanglutsü tenzük aser ibaji November 30, 2015 nü lapoka liasü. Iba sülen nungi Sanuoro ayong nung Four-lane RCC Arch bridge yanglutsü tebilemsta ka

lensatetp. December 2015 nung Ministry of Road Transport & Highways (MoRTH)-i iba mapatong inyakttsü atema sen lemkütsü aser July 2016 nung M/s Vilelie Khamo aser KC Angami (Joint Venture) nem mapa lemkütsü.

December 29, 2015 nü CRF (MoRTH) kübok Rs. 20 Crores lemkütsü aser 2021 nung mapa talila kar inyakttsü atema State Resources kübok Rs. 15.81 Crores lemkütsü. Iba mapatong nung Rs. 35.81 Crores endok aser iba nungi contractor tem nem Rs. 12.35 Crore agütsüogo aser Rs. 23.46 Crore magütsü lir.

Tanü apu lapokba sentong nung mendenji Principal Secretary PWD Menukhol John Iiasü, Rev Keviyekielie Linyü-i meshiteta sarasadem aser CM Rio-i lapoktsü.

Sentong nungsa Deputy CM Y Patton, MLA tem, Department ketdangsurtem aser Kohima Village nungi lennirtem aden.

December ita Naga yimjung olemtep alitsü akok

Dimapur, November 29, 2021 (TYO): Union Home Minister Amit Shah-i Naga yimten tebilemstsü indang jembitsü atema Nagaland Chief Minister Neiphui Rio den yakta senden ka amentsü.

Union Home Minister Amit Shah den ajuruteptsü atema anogo ishika tsüingda pa Delhi-i aotsü ta Nagaland CM Rio-i tanü ashi.

HM Amit Shah aser CM Rio nati Naga yimten tebilemstsü dak alia opposition maliba United Democratic Alliance (UDA) sorkar den sendakba onüktem lemsateptsü.

Home Minister Amit Shah-i pa dang Delhi nung amentsü aliba senden nung adentsü shiogo ta tanü Rio-isa metetdaksü.

December ita tetenzüklen pa

Delhi-i aotsü sentong lir ta paisa shisem.

Naga yimten latettsüba nung NSCN(IM) aser Centre tsüingda Framework Agreement ajanga tetsükdaksü agütsü ta osangtem jembiba atema Rio-i "iba tenangzüktep ya India sorkar aser NSCN (IM) tsüingda sign sütep anungji parnoki tajungba metettsü" ta ashi.

NPF nem portfolio melemzüktsüba: Nagaland nung opposition maliba sorkar United Democratic Alliance (UDA) akümba sülen Naga People's Front (NPF) nem portfolio lemkütsütsü asü masü ta tanü osangbeneri asüingdang "onok jembitepdar" ta Rio-i langzü. Taoba Chief Minister T R

Zeliang nem cabinet menden agüja Naga People's Front (NPF) Legislature Party shimba dak alaka CM Rio-i tanüingba NPF MLA 25 ano manik lir.

"UDA sorkar makümdang teinyakttsü onük kecha lateta mali aser onok ya tongtipangji Naga yimten tebilemstsü atema longjemba lir" ta Rio-isa ashi.

Rengma nungeri district ahangba : Rengma Naga nungeri Kohima district kübok Tseminyü Subdivision nungi district balaka kümtettsü ahangba atema CM Rio-i "telok 9-10 shi kati district akümtsü atema takhangba agütsü aser sorkari iba atema luden ka tetetogogo aser parnok indang osang atar" ta metetdaksü.

Nagaland Police-i "Call your Cop" mobile app sayaogo

Nagaland DGP-i sensotem dang iba app download asütsü ayongzük.

Iba ya tongtipangbaji tetsür dak tashiyim mapa inyakba anendaktsütsü aser tetsürtem kümzüka ayutsü atema lir, ta John Longkumer-isa ashi.

"Nagaland police-isa sensotem den tesentaktep tajungba akümtsü atema community outreach programme (COP) ka tenzükogo. Iba ya police aser public tsüingda community policing tenzükba mapa ka südaktsüdi" ta paisa ayongzük.

Benjung mongpu atongba aser ano December 1 nungi Hornbill benjung tenzüktsü aliba atema Nagaland Police-i Mongulbarnü Tourist Police Control Room lapoktsü. Iba atema helpline number 112 alitsü aser wireless connection balaka agütsütsü.

"Nagaland atema konang-Hornbill Festival nung lendong mataloktsü aser ozüing alema meinyakttsü atema meranger" ta Nagaland DGP-isa metetdaksü.

"Iba atema Tourist Police indang tebilemstsü tulu lir. Nenoki ainertem aser semdangi arurtem dak tauchi sayua aser yimya tajung agi akokba tashi yariteptsüla. Item maparen ajanga police aser public tsüingda tesentaktep akangshitsü inlar" ta paisa ashi.

Kohima, November 29, 2021 (TYO): Nagaland Police-i public yaritsü atema Hombarnü "Call Your Cop" Mobile App sayaogo.

Iba app ya Naga Headquarters Nagaland CID branch-i Excellogics Tech Solutions Pvt Ltd Nagaland den yaritepa yanglu.

"Iba ya mobile app ka lir aser Nagaland Police ajak indang contact numbers aser tanga osangtem lir" ta Excellogics Solutions nung Business Development Manager, Zhavi Nagi-iashi.

"Call Your Cop" Mobile App nung directory, alerts, tourist tips, SOS & emergency numbers, anasatiba police station aser search feature lir, ta laisa ashi.

"Iba app ya Nagaland Police indang osang tejangja ayutsü aser police ketdangsur / Police station bushitetba den landline number, mobile number aser email ajak angütsü atema yangluba lir" ta Zhavi Nagi-isa metetdaksü.

Iba App nung news, updates, advisory amala angütsü aser rondak nung amshitsü atema quick dialer keta lir. Iba app ya Google Play store nungi download sütettsü, ta laisa ashi.

"Iba mobile app ajanga sensotemi aser talisa lendong ajuruba mapang nisungtemi melamela police den tongteptsü akok" ta Nagaland DGP, T John Longkumer-i app sayatsüing ashi.

Nagaland Police Service Association pur Hon Jubilee mungogo



Dimapur, Yimpoksüi/Nov. 29 (TYO): Nagaland Police Service Association (NPSA) pur Hon Jubilee benjongmung November 27, 2021 nü Nagaland Police Officers' Central Mess, Chumukedima nung munga liasü. Iba sentong nung Deputy Chief Minister Nagaland, Y. Patton ya alakteta jaoker aser Director General of Police Nagaland T. John Longkumer, IPS ya tesemdanger tongti ka ama dena liasü.

Patton-i iba sentong nung jembiba mapang, NPSA züngsemtem dang amashitsü makokba küm 50 tongtetba atema tepela lemsatap.

State sorkar kübok Nagaland Police Service yagi "Premier Service" jenjang agia lir. NPS Cadre shilem tulu lir, kechiaser jenjang balala nung iba züngsemtemi tongti shilem agir aser State nung parnok ya Police Department indang tongtoret ta züngshitsü akok aser parnoki shilem tajung agiba ya sorkari lenmang balala nungi pelaba

sayuogo, ta pai ashi. Pai NPSA züngsemtem dang maneni tensa den apert security agüja nübör ajanga molungjang nung tetsübu kecha melidaksütsü ayongzük aser maneni police force indang skill, research aser tashi tajungba nung lidaksütsü ayongzüka liasü.

Police Force temi ajangshiba timtem balala bentetratetsü asoshi sorkar temolungtetba lir, ta Deputy Chief Minister-i ashi aser maneni Nagaland Police indang omen "Security, Service and Sacrifice" ama nübörtem atema bendanga agütsür nendaka inyaksü ayongzüka liasü.

Nübörtem süngjema ayutsü aser ozüing shidak amshitsü, mapa tamajung inyaker puteta bushisingdangtsü atema NPS officer tem ya tongtoret ka mesüka lir, ta Patton-i ashi.

State tentetba sülen telungpuri tebilemetsü agi sünga aruogo aser iba mapang NPS officer tem yakbang nung nokdaker Naga nunger tenzüka

aser kumzüka aru aser iba mapang state aser linük nung yimjung aser tesunep atema aika takum agütsüogo, ta ashi.

Akhi mapang nungi amshia aruba yimyatem, talisa mapa tamajung bushistingdanga, mapa tamajung nungi nokdanga aser putetba ya teinyaksü mezüingbuba lir, aser iba den külemi police temi tanü timtem jenti ajurur aser itemji loktiliba, sobaliba aser tenchology tsütsü temelenshi ya ka alitsü, anungji kanga yakyaka aser ochishia inyaksü nüngdaker, ta Patton-i ashi.

Tanü tensa den apert technology tsütsü sepaitem renema alitsü aser ochishia inyaksü nüngdaker, ta paisa ashi.

Iba sentong nung General Secretary, NPSA Shouka Kakheto, NPS menden liasü aser NPSA tir, Teisovise Metha, NPS ajanga tir o jembiba. Maneni Kihika Sumi Chishi, NPS ajanga temeja ken ka aten aser Asst. Secretary, NPSA K. Lucy Yhome, NPS ajanga melepzüing o jembiba liasü.

Hornbill Festival 2021 atema Kohima nung traffic totuyuba kar metetdaksür

Dimapur, Yimpoksüi/Nov. 29 (TYO): Government of Nagaland ajanga Naga Heritage Village, Kisama nung Hornbill Festival December 1 nungi 10, 2021 tashi ayongzüksü aser iba dak sendakba nung sentongtem Kohima Town kübok tesem balala nung alitsü.

Benjongmung mapang garitem timi senzütetsü mechi Kohima Police ajanga teinyaksü kar tuyuogo.

December 1 nungi 10, 2021 tashi gari tulu kata anepdang 7:00 ako nungi aonung 10:00 ako tashi Kohima Municipal area-i aitsü memelatsü. Gari tem mesümenanga jajaba nungi kumzüksü mechi gari tulutem Chaprü Peducha, Jotsoma By-Pass, Khuzama Police check gate nung anendaksütsü.

Kohima Municipal area telungzük nung loading/unloading ajak anepdang 7:00 ako matongdang renemtsüla.

Y-Junction Phoolbari nungi Razhü Point tashi lenmang nung Kohima Night Carnival akatsü

mechi benjongmung mapang anogoshi nikongdang 3:00 ako nungi aonung 10:00 ako tashi gari maitdaksütsü. Gari ajak Y-Junction nungi Local Ground (Khuochiezie) ajanga Razhü Point leni aotsü.

New Market nungi New NST tashi lenmang nung nikongdang 3:00 ako nungi aonung 10:00 ako tashi gari kata maitdaksütsü.

Classic Point aser PHQ junction tsüingta gari kata anena ayutsü memelatsü. Iba lenmangtem nung aliba gari ajunga New Multi-Level Parking building, Old Medical Directorate nung anena ayutsü.

PHQ junction (BOC bus stand) nung aliba bus stand ya tang aliba nungi NSF Martyrs' Park jakdangi belentsü.

Hornbill Festival 2021 mapang item tesemtem nung gari anena yutetsü - New Multi-Level parking building, Old Medical Directorate; City Centre (Old MLA Hostel building) aser Northern Gate Local Ground,

(Khuochiezie).

Commercial pick-up gari ajunga KMC Chau Parking, Forest Colony aser Tata Parking, Bayavü nung anena ayutsü. Commercial pick-up gari kata temelaba agüja maliba parking area nung anentsü memelatsü.

Kohima aser Kisama tsüingta jajartem aser Kohima telungzük nung jajartem gari mesümenang masütsü atema item lenmang nung jajatsü metetdaksü:

NH-29 - Merhülietsa Colony (Para - Medical) - Old Fira Jn. route.

T.C.P Gate - Midland - Lower Chandmari - A.G Colony - Lerie - NH-29 route.

BSNL Jn - Old Ministers' Hill - New Ministers' Hill - Aradhura - New Reserve - NH-29 route.

NHK junction - New Market - Nagabazar - Census Office junction.

Item totuyuba aser ozüing ya December 1 nungi December 10, 2021 tashi amshitsü, anungji ajaki tashi angatsü mepishir, ta Kohima Police ajanga ashi.

Akhoyatsür Telongjemi tenüngsang agütsür

Kohima, Nov.29 (TYO) : Superintendent jenjang anguba; Nagaland government tenzüker Akhoyatsürtem rongnung, tawa, pei mapa nung jenjang temaba angurtem par pezü nem Akhoya Sensotsür Telongjem Kohimai sangdong ka ajanga tenüngsang tulu agütsüogo.

Itemji Wt.Arenla Longkumeri Deputy Secretary jenjang anguba; Wr.Akokla Tongeri Assistant

Superintendent jenjang anguba; Wt.Mapulai Special Grade Typist jenjang anguba aser Wt.S.Amenla Jamiri UDA jenjang ngutetba takoktem liasü.

" Tsüingremi ano maneni nübörtem asoshi parnok taküm aser mapa moajang," ta kasa sangdong nung ASTK nung mendenbula Wt.Chubasenla aser tezülula Wr.Alangla Tonger nati moaja metetdaksü.

R. Khing-i Community Thutho Project semzüksü

Dimapur, Yimpoksüi/Nov. 29 (TYO): Advisor, Animal Husbandry and Veterinary Services, Women Resources Development, R. Khing ajanga November 29, 2021 nü Vegetable Village, Kidima nung Community Thutho (Cattle) Project semzükja liasü.

Iba sentong nung jembiba mapang, Thutho yagi tatsük aser temokong tesem nung litetsü aser Government of India-i Thutho Project ya agizükogo, ta Advisor Khing-i ashi.

Pai yimdaklir dang pei poksüngtsü atema masü saka dangar dang ayoktsü atema inyaksüla aser iba project ya tatishitsü tajung aketba ka asütsü imlar, ta ashi.

Advisor, Youth Resource and Sports, Er Zale Neikha-ia iba sentong nung jembiba aser nübörtem dang iba facility anepalua amshitsü ayongzük.

Managing Director, NLDB, Neikyelie Theünuo-i sentong nung ashiba agi, nashi 200 metsütetsüsa tesem asem nung ali temu atema nashi sü bendenba tesem 30 keter yanglua lir.

Training Centre nung cowboy

quarters keter yanglua lir. COVID-19 tashidak wara mechi kisü-jensüba nung junga renloka moteti lia aruogo, ta Managing Director-i sasaba ashi.

Kidima yimtsüing ya Agriculture department ajanga Vegetable village sangdonger aliba ajanga iba yimtsüing ya shimtet, ta Theünuo-i ashi.

Küm ka nung sen crore asem jenjang aonsotsü yokzükba atema Dr. Theünuo-i Kidima nung aliba nübörtem nem tenüngsang agüja liasü.

Community Thutho Project ya Nagaland state nung mezüingbuba alitsü aser nübörtem dang model village ka ama asütsü ajungshia liasü.

Iba project atema Kidima yimtsüing shimtetba asoshi Chairman, Kidima Village Council, Zakitol Thol-i Department aser Nagaland sorkar dang pelaba lemsatapa liasü.

Iba sentong nung Secretary, Animal Husbandry and Veterinary Services, Khrupi Sothu, IAS menden liasü aser NLDB indang Project Co-ordinator, Dr Kuokehebi Gwirie-i melepzüing o jembiba liasü.

Mmhonlumo Kikon-i Brillante website sayatsü

Dimapur, Yimpoksüi/Nov. 29 (TYO): Advisor, IT & C, New & Renewable Energy, Science & Technology, Mmhonlumo Kikon-i November 29, 2021 nü Directorate of IT & C, Kohima nung Brillante, the Nagaland piano festival 3rd edition indang website sayaja liasü.

Iba sentong nung Mmhonlumo Kikon-i jembiba mapang, Brillante, the Nagaland Piano festival 3rd edition ajanga piano music tsütsü world map nung Nagaland inoktsütetba atema tenüngsang agüja liasü.

Iba sentong ya kanga tekolok ita yangluba lir aser küm süitema aodang ibai India indang music scene nung dangari tushiba aser metetba brand ka kumogo, ta pai ashi.

Brillante ajanga nisung aika takum nung kongshiba atema pai Brillante team nem tenüngsang agütsü aser parnoki takok anguba ajanga par takum melenshiba kisüing masü saka music industry nung temelenshi adokdaksür ka kumogo, ta ashi.

Brillante nükla aser mangdang nung Nagaland ya India nung piano capital akumtsü imlar aser Nagaland alema oa piano amshitem yaritsü, ta ashi.

Nagaland ya state tilaka dang süaka national aser international sapang nung iba ama mera agütsü nüngdak, ta Kikon-i ashi.

Nagaland nung amendaker sentong agiba tentet ka indang official website sayatsütsü ya jangratema bilemer, ta pai ashi.

State nung music jenjang tajungtiba kati aniba atema pelar aser online portal tejangja ka amenokba ajanga alima nem asen ola

tejangjaba angashidaksütsü, ta ashi.

Technology putu ka nung music aser arts yanglutsü atema sempet nüngdaker, aji asünung dang music aser art tsütsü takum junga litetsü, ta Kikon-i ashi.

Iba website ya ajanga alimai metettsü aser iba tentet ajanga sentong balala ayongzükba aser mapa inyakba tali timbai metettsü, ta ashi.

Director, Brillante, Khyochano TCK Ngully-i iba sentong nung ashiba agi, Brillante ya piano music ajungkettsü aser kentener tasentem nem sapang agütsütsü atema lir.

Nagaland nung piano music angazüktsü aser piano music ajanga nisung takum nung kongshiba benjongtsü atema iba sentong ya ayongzük, ta lai ashi.

Music nung lokti ajungai shilem agütsü nüngdaker aser classroom tem kisüing nung masü saka lokti nunga amshitsüla, ta lai ashi.

Nagaland nung iba benjong ya 2017 küm tenzüker aser 2019 küm national jenjang nung ayongzük aser tasembuba ya international sentong ka lir, ta Ngully-i ashi.

Iba sentong ya virtual nung December 15-17, 2021 nung YouTube nung tenzüksü aser iba sentong nung linük trok nungi shilem agütsü, ta lai ashi. Laisa Brillante ajanga takok balala ngutetba aser state nung kentener nem teimla agütsüba indang lemsatapa liasü.

Iba sentong nung taoba benjongmung indang video tatsüka sayu aser Vizotha Nagi-i piano solo agi shilem agia liasü. Iba indang website ya www.brillanfest.org alitsü.

AASU tanishir ka tepset; Assam CM-i...

(TAPAK 1 NUNGI...)

ASSU tanishir Bhuyan ji Golaghat district kübok Dergaon nungi liasü aser journalist Baruah ya nija TV news channel ka nung inyaker.

Jorhat police-i iba dak sendakba nung nisung asem puogo.

"Onoki nisungtem jangjatsü atema video footage repringdar. Tang tashi nung onoki nisung asem puogo aser maneni bushisingdang südar. Onoki nisung ajak apütsü, shinga meyütsütsü" ta police ketdangsür kati ashi.

AASU-ia iba mapa inyaker ajak

apütsü takhangba agütsüogo.

"Onoki police nem ghonda 24 tsüingda nisung tepseter ajak apütsü mapang atakzüksür. Police-i iba mapa meinyaketra, AASU-i mapa inyaksü" ta AASU general secretary, Sankar Jyoti Baruah-i ashi.

**GOVERNMENT OF NAGALAND
HOME DEPARTMENT
GENERAL ADMINISTRATIVE BRANCH-II
PRESS RELEASE**

No. GAB/GEN-4/2015

Dated, Kohima, the 29th November, 2021

Home Department has informed that the State Level function for the celebrations of the 59th Statehood Day to be held at the Nagaland Civil Secretariat Plaza, Kohima on 1st December 2021 (Wednesday), from 08:45 AM onwards, will also be live streamed on the MyGovNagaland's YouTube Channel.

Interested viewers can watch the event online on YouTube and Facebook by visiting the MyGovNagaland Page or by directly clicking on https://www.youtube.com/channel/UCYpIWIak_KPbdqvToVHmB6g/live.

(NUSTIETA RAKHO)

Additional Secretary to the Govt. of Nagaland

CM Sarma-i Majuli-Jorhat apu yangluba mapa tenzüksü

Guwahati, November 29, 2021 (Agencies): Majuli nungi Jorhat tashi kilometre 8.25 shi Brahmaputra ayong ajangdanga yanglutsü aliba apu maparen Hombarnü Assam chief minister Himanta Biswa Sarma-i tenzüksüo.

Iba maparen tenzüksüba den külemi Sarma-isa Bongalmora anasa Dhunaguri nung Lakhimpur district den Majuli sendaktepa apu tanga ka yanglutsü asoshi sangdongogo.

Iba project atema Centre sorkar ajanga sen crore 925.47 agütsüo.

Majuli nung iba project tenzükba indang noksatem Twitter nung lemsatepba mapang, Sarma-i

"Majuli nungi Jorhat tashi kilometre 8.25 shi apu yanglutsü maparen densema Majuli kübok Dakshinpat nung Brahmaputra ayong ajangdanga NH 715K yanglutsü asoshi maparen tenzüksüo," ta ashi.

"Iba project atema crore 925.47 tenlaba atema onoki PM Narendra Modi aser Union Minister Nitin Gadkari dang pelaba metetdaksür" ta Sarma-isa ashi.

"Iba project dak sendakba maparen anogoshia reprangshimtsü atema Cabinet Committee ka tentetogo" ta chief minister Sarma-isa shisem.

November 2025 tashi nungbo iba apu lapoktsü Assam Sorkar tebilemba lir.

Sarma-i, Bongalmora anasa Dhunaguri nung Majuli-Lakhimpur sendaktepa apu ka sen cr. 750 indoka yanglutsü asoshi Assam Sorkari inyaktsü, ta ashi.

GGPG atema British Council-i Dibrugarh University shim

Dibrugarh, November 29, 2021 (Agencies): Terenlok maparen asoshi India nung Going Global Partnerships Grant anur Institution 8 rongnung Assam indang Dibrugarh University ka kümogo. Iba Grant ya British Council ajanga agütsür.

Iba tesentaktep ya Dibrugarh University aser Queen's University, Belfast tsungda asütsü.

Tesentaktep ajanga strategic networks aser computing nung 'transnational multidisciplinary course' terenlok lidaktsütsü atema Dibrugarh University nem British Council-i iba grant agütsü.

India aser UK nung kaketshirtem alima sabang den jangyumedema tangazükba tsütsü tajangshiba lidaktsütsü atema maangka agütsütsü nükjidong nung iba grant agütsür.

Iba collaborative Grant atema shimer tanga institute rongnung IIT Roorkee, IIT Kharagpur, Tata Institute of Social Sciences, Gandhi Institute of Technology and Management, SRM Institute of Science and Technology, Transnational Health Science and Technology Institute aser Indian Institute of Science dena lir.

Undergraduate aser graduate level nung joint aser collaborative teaching bendenloktsü nükjidong aser iba mapatong ulushitsütsü atema British Council-i 'pre-existing partner' tem nem collaboration grants agütsüo.

Iba Grants ajanga teaching aser collaboration model ka yanglutsü aser UK aser India nung bachelor's mesüra master's qualification tsütsü nungittsü course mesüra module ka agütsütsü nükjidong yur inyaker.

Iba programme kübok, collaborative partners tem UK nung service providers talisa ENIC, QAA aser iba dak sendakba tanga kongsang nungi consultancy services angutsü.

Iba den bendenloksema, UK nung shisaliok tajangzükba ajangshidaktsütsü atema item services yagi Grant shilem ka agitetta kaketshirtem nem TNE bursaries mesüra scholarships agütsütsü asoshi inyaktsü.

PROGRAMME FOR CELEBRATION OF**59th STATEHOOD DAY****NAGALAND CIVIL SECRETARIAT PLAZA, KOHIMA**

0850 hrs : Parade Review by DGP, Nagaland

0900 hrs : Hon'ble Chief Minister arrives & takes the General Salute

: Speech by the Hon'ble Chief Minister

March Past

1. DEF Kohima
2. 4th NAP Bn.
3. STF
4. 9th NAP (IR) Bn.
5. 13th NAP (IR) Bn.
6. 15th NAP (IR) Mahila Bn.
7. NPTS Brass Band
8. 15th NAP (IR) Mahila Pipe Band

Parade Commander : **Dr. Kupe Kapfo**
Deputy Commandant, NAPTC

Second-in-Command : **Smti. Medemkala**
Asstt Commandant, 15th NAP (IR) Bn.

The Gael : A Musical presentation by NPTS Brass Band and 15th NAP (IR) Mahila Pipe Band.

Launching of NIPUN Bharat Mission in Nagaland by the Hon'ble Chief Minister**Cultural Presentation**

1. Suno Gaur Se Duniya Walo : Song and Dance Display by TaFMA
2. Cultural Troupes (a) Aong Reju Cultural Organization Kohima (Ao)
- (b) Pfusion Thuzi Cultural Troupe (Rengma)
- (c) Khiamniungan Cultural Troupe Kohima

Inauguration of Photography Exhibition on 'Glimpses of the History of the State' by the Hon'ble Chief Minister



TIR YIMYIM YIMOBILEM (EDITORIAL)

DIMAPUR RASEMNÜ, YIMPOKSÜ (NOVEMBER) 30, 2021

Tatidanga magütsünü akümer

Tanü putu nung ya kidang tsüraburtemi aser kaketreju nung tesayurtemi tanurtem dang shitakba aser asangsang lima nung lia aotsü asoshi temetetba shisatsü bushitsü atema tim tesayuba agüja mesayutetra, tanurtem shingaia pencil bener arua A, B, C zülua mangazüknüsü aser kaket azüngtsübaji parnok sobaliba masü akümtsü. Joko, tanü asüng chirnurtemi radio angatsübajibo yutsür television-a merepranger aser osangkakettem azüngtsübo pongmang amai kümogo. Iba denji metenser yaküm küm nungi alima tashidak wara agi tanurtem shinga kaketreju mao kidang nungi mobile phone ajanga dang tesayurtemi sayuyim balala agi sayua aruogo. Aji oda, tanurtem aika class takdang mengudang ser temaba class-i tuogo. Atangji, kidang nungi mobile ajanga tesayurtemi sayuba nungia tagitsü aiter tanurtembo tangazüksü tim angazüka shitak odagi saka tanurtem ajakji kasa masü, teimbaka tagitsü mait, mobile phone-ji pei atema kaketreju kümer, ano mobile phone nung tangar tashitemetter aser tesayur mongintemi enoka yutsüba shisatsütem talila bushiloka pei tesayurtem dang nungi tajungba akümtsü merangtsü melen, kaketshir aikati mobile phone-ji pei jangraba asaya asayatsü aser pei reprangnüba noksa reprangtsü aser pei anganüba ken angatsü atema dang amshia mapang endoker. Atangji, mobile phone nung ajak enokja lir, anungji ongko inyaksü asoshi kecha tokolok belema tabenba, tebendenba, talemba aser teindokba ongko inyakyim angazüksü menügdaker. Aji oda, mobile phone nung akhi alima yimten, sobaliba aser arogo otsü ajak enoka lir, anungji itemji angazüksü atema kecha mapa bolua kaketsa kaket zünga temulung nung ayutsü nüngdak madoker. Asenoki kechi metetner aser kechi nguner ajak asen ket nung aliba mobile phone tilaka nung temetetertemi enokja lir, anungji asenok mapajibo tebok sünga chiyongtsü aser anisüngzüka mener mobile nemshia kazütsübaji dang amai asenoki bilemer. Iba kasaji tanü asenok chirnurtem aikati inyaker. Ajisüaka, tebilemtsü kaji, mobile kisüng nemshia kazüba agi pasasa chiyongtsü marutsü aser mobile nemshia kazüba kisüng jagi chiyongtsü tazü agi tamen küma mechiyongtettsü. Mobile kisüng nemshi ashiba agi, UPSC aser NPSC ama tatidang agütsütsü makoktsü, kechiyong item tatidangtem nungbo asen meyong smart phone nung enoka aliba temetettsütem reprangtsü memelatsü. Ibaji dang masü saka pei kolok nung kecha mali, tazüng serbo mobile phone ajanga metetba kisüng agibo taküm nüngdak kecha takok ngua meinyaktetsü. Aji oda, mobile phone ya asenoki memetetba asüngdangtsü asoshi masü saka asenoki metetba lemsateptsü asoshi amshir ta asenoki metettsüla. Joko, kaketshirtema mobile phone ajanga dang class agiba aser tatidang agütsüba nung yimya sübadoker, tangbo kaketreju nung mener tatidang agütsütsübaji tim masü amai bilemer, anungji kaketreju tonga moi mobile phone ajanga dang tatidang agütsünüa longkak aitba asenoki angur. Atangji, tashidak wara ano mesüitem, anungji takdang ka nung kaketshirtem nungtepa mener tatidang agütsütsübaji mesadem aser lendong lir. Iba timtem aser shisaboluji bangdak purtemi reprangtsüla. Ajisüaka, kidang mena yur mobile phone ajanga angazükba aser tatidang agütsüba nung anguba takoktem agibo tangar den tashitemetet toktepa sabang nungbo metokteptetsü. Kaketshisatsü bushiba ya, shitakba agibo tazüngba kuli kaket mesüra degree bushirba masü saka pei shisa kolok saladakja tashitemetet aser shisa tasen bushilokba mapa lir, anungji asen kechi tashi azüng (?) ta asüba putu to masü saka tanübo asenoki kechi metet ta asüba putu lir. Iba jagi, Bill Gates nunger kaketreju nung tazüngba degree junga mangurtemiang computer sentong tapu balala purapiteta alima atsüshir. Akhidang azünger asen tsüraburtembo pei tenüng sülen pei azüngba degree BA, B.SC (Honours) ta mesüra MA, B.SC, M.SC, LLB, LLM ta zülubaji peii meranga zünger ngutetba mera taket jenjang ka liasü. Iba amaji parnok dak temetetba liasü. Ajisüaka, tanü tensa class takdang nung kena memendang ser graduate südaktsüra, tazüngba degree agi inyaksü masü saka pei dak aliba temetetba shisatsü agidang inyaksü alinungji, tazüngbo tuluka azüng amai aser mapaa iba yariji angu amai, saka mapa inyak kecha mashitsü. Ashiko, tanü iba ama mapa inyak mashi ser inyakertemi pei nübortem kanga akoksadakja alitsü. Joko, Mobile phone aruadoker asünungji, mobile phone amshi ashitsübaji nisung shia mapa kümogo. Ajisüaka, tanurtem nem tila asüdangyongi mobile phone mamshidaktsütsüla aser mobile phone ya tsüraburtemi tanur ajep mesüzükba oset aka amai mamshitsüla. Iba kasaji, tsüraburtemia nüngdak metetpelateptsüba dak alaka mobile phone agi kazütsü oset kümer, pei mapa aser tanurtem dak endoktsüba mapang mobile phone amshiba nung meindoktsüla. Tsüraburtem asoshi mobile phoneji pei chirnur mekümdaktsütsüla aser tanurtemia mobile phoneji pei tsürabur aser tesayur mekümdaktsütsüla. Mobile phone agi asenok taküm alitsü masü saka taküm junga alinung dang mobile phone-a amshitetsü.

OLEMSABANG

Ao Ojang "Mulung" nung semlokba

~ T. Meren Paul, Kohima

Arok Osep (Dictionary) nung "Mulung" ta amshiba ojang nung tanapuba ojang ka bendenlokba ajanga tetetzü palakaadokba ojang16 tashibendena enoka aliba angur. Mulung nung tejaklen zülujang ana aketba ojang "me" bendenlokra 'memulung'akümer saka tesülen ji zülujang ana "er" bendenlokra 'mulunger' akümer. Mulung ojang nungji tesülen ojang bendenloka (suffix) tetetzü adoka jembiba aika lir aser nia karh bushia züluloktsüdi. Asenok teintet rogo ajaki aseni ajangshia aruba aser metetba ojangdem osang kaket nung mapang shia zülü nungbo idem ojangdemji lanu asensordemi angazüksü aser karh-i tengah bendenayurabang mesamatsü. Arok Osep nung tetetzü rasa-a shiaaliba ni lepshia mezülur saka *AO ta enoktsür. Ni Science student liasü aser English subject PU Science tashi dang azüng asünung PU standard English nung meyipzükogo, karhbo tai alitsüa akok saka anasaibo arutsü südi.

1. **Mulung*AO-**
2. Mulung- süng, lung aser yimya nung akumba telung nung keta aliba temulung, süng mulung, lung mulung, nisung mulung amala, core.
3. Mulunga- hai ta ashiba, nongnanga masü, mulunga agizükba, willing.
4. Mulungachi- taginüba ama inyaktetba agi temulung chia pelaba, satisfaction.
5. Mulungajem- temulung eila-a akümba, arendaka bilemba, discourage.
6. Mulungajem- tebilemba kesabener ajurutepe, shisa obang agizüktep, one accord.
7. Mulungamsah- tejashitsü, tesama tulu ajuru, aria bilem, compunction.
8. Mulungarong- tejashi tulu, temulung rongsa, sorrowful.
9. Mulungasen- temulung agi küta sena agizük, shimtet, passionate.
10. Mulungashi- temulungjang ashiba, angoba, heart pain.
11. Mulungazü- tangar asoshi temulng raksa, aria bilem, compassion, pity.
12. Mulungbena- ajungbena mulungsua hai haura aka, spontaneity.
13. Mulungbensa- telok den/tangar den mulungsoa atenba, willingly.
14. Mulungboa- temulung achi, yimlaba ama atalokba nung tepatem, contentment.
15. Mulungbondok- shisabulu khuret tembangba, bendokba, cast off burden
16. Mulungchimi- temulung nung lemtetba lenmang tai asü, wrong choice.
17. Mulungchinu- tebilemba madong, meinyaktet, tamakok alu, discomfiture.
18. Mulungchitsü-temulung pelatsü kechesarena, to satisfy.
19. Mulungdangtsü- tagitsü aittsü angazüksü sayubentsü, moral lesson.
20. Mulunger- hai, hau ta agizükba, willing, agreeing.
21. Mulunger- kin shilu ka shir asen Aor dang tama Tongtong atang ajanga ao. The group of migrants who precedes the Ao people venturing towards the west.
22. Mulungjang- temulungjang, heart.
23. Mulungjangra- temulungjang nung adokba tashidal, heart disease.
24. Mulungjangrah- temulung nung inyakdangnua jangraa aitba, desire of the heart.
25. Mulungjashi- mulung mepela, tepela melii aküm, displeasure.
26. Mulungjashila- tejashiyim aser teimtesü nung jashiba, reason to be annoyed
27. Mulungjatet- *AO-
28. Mulungjetem- asahmeyang shisatsü, lentong ajak tatem akümba, zenith.
29. Mulungjem- ken o obang ka masü, telok metetet kijakija aliba, not united.
30. Mulungjenok- shisapulu khuret mapang atsüngokdak, refuge in time of distress.
31. Mulungjepjep- nemnemshinem aketba mulungsentsü, grumble, disgruntle.
32. Mulungjetsa- lendong atalok saka teyari kecha magütsüteti tereprangtang repranger doktsüba, agonizing, heartfelt.
33. Mulungjokjok- yakta apusor, ain adoker, shisa tatsü, restive, restless.
34. Mulungjulok- telemsa adokba telok palala rongnung atenba-partake.
35. Mulungjung- shisatsü tajung, temerak aser temeim, benevolent, descent.
36. Mulungjusa- aseni bilemba masüsaka tangari jusatsüba agiba, instigation.
37. **Mulungka *AO-**
38. Mulungkangket- aoksa, tsüba aküm, terrified, fearsome.
39. Mulungkangok- temulung takang, kangoka yur matsüngshir, tenacious.
40. Mulungkhuret- khuret tulu ta temulung nung agizükba, personal problem
41. Mulungkirak- jaklaliru mulungsentsü meindang, tekirak, crooked
42. Mulungkottet- mesüzüktetba, hai haura agizükdaksüba, convincing, win over
43. Mulungkong- tobor tajung tenemkong südaka aliba tekong koba nung MulungYim ana prongla küma lir - name of the beautiful range upon which Mulung villages are established.
44. Mulungkongshi- aseni memeteti aliba mapa, yimya yimko aser otsü olem indang asenden jembibaaseni tenoka agizükba, moved, touched the heart.
45. **Mulungku *AO-**
46. Mulungkuok- temulung kanga kurema mamatetsüsa jashiokba, deeply hurt.
47. Mulungkurem- tatalokba tamajung meji temulung kurema jashi. Sorrowful.
48. Mulungladak- temulung teladak, kecha miyimshia mayur, shallow, candid.
49. Mulunglahdang-temulung metettsü külaka asameyangba, spying, snooping.
50. Mulunglemba- temulung lemtetba nisung, tebur, trustworthy man.
51. Mulunglemdak- temulung alemdak, teimlatsü akadak, expectation, sort of trust.
52. Mulunglemdi-takoktsü, inyaktetsü, ataloktsütsü ta amangba, reposing trust.
53. Mulunglemla- jembishinü telemsa, o taka, lemla lemlaer, cheerful, lively.
54. Mulunglemtet- tamang katetba, temulung doktetba, trusted.
55. Mulunglemtsü- teyimlatsü, tamang katettsü, meyzütsü ta yimlaba, reliable.
56. Mulunglok- telemtetba nung denssem, support, consented.
57. Mulunglung- tenaritepolong masü, not round or circular.
58. Mulungmabo- yimlaba ama masü saka eshiba, tajemba, below expectation.
59. Mulungmachi- mulung mepela, mulung jashi, meperi, discontentment.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Philippines nung Tenla ki amakba ken o nung nisung ka apu



2019 kum January 27 nu Philippines kubok Jolo nung bomb ana amshia Our Lady of Mount Carmel Tenla ki ka amakba sülen tangokba noksa nung angur.

November 29, 2021: 2019 kum January ita nung Philippines nung Tenla ki ka amakba ken o nung Zamboanga yimti anasa yimsung ka nung police-i Abu Sayyaf telok nungi bomb yanglur mongin ka puogo, ta International Christian Concern (ICC)-i metetdaksü.

Iba ken o dak sendakba nung police-i apusangji arrshi kum 42, Kalmi Ammad Mustala lir.

City police director, Colonel Rexmel Reyes-i, anepdang

Recodo yim anasa tzüyimkümlen Mustala apu aser tang pa jail nung puoka lir, ta metetdaksü.

Col. Reyes-isa, ozüng alema bomb amshiba ken o dak sendakba nung June 19, 2021 nu Sulu Court-i Mustala aputsü tuyuba nung ajemdaker police-i pa puogo, ta metetdaksü.

Mustala ya Jihadist kiralongrar telok- Abu Sayyaf nung züngsem ka lir aser 2019 kum January 27 nu bomb ana amshia Jolo nung aliba Tenla ki ka amakba nung pai shilem

agia lir ta bilemer.

2019 kum January ita nung Indonesia nung apuani nati temang nung bomb alenloker Phillipines kubok Sulu province yimtiba, Jolo nung aliba Our Lady of Mount Carmel Tenla ki amakdang nisung 21 pokset aser nisung 102 yirua liasü.

Iba tatalokba nung Mustal-ia shilem agia lir, ajisüaka tongti asalentong yanglurjibo Abu Sayyaf lenir, Hatib Hajan Sawadjaan asütsü ta police-i melung malemer.

Pakistan nung tai tonglokja alir Khristan ana bail nung chiok

November 29, 2021: Pakistan nung Tsüngrem mezüngmeshiba ken o nung tai tonglokja alir Khristan nurse ana bail nung chiokogo, ta International Christian Concern (ICC)-i metetdaksü.

Pakistan nung yimtenren party- Tehreek-e-Labbaik densema Islamic telok balala mejashidaksütsü atema Khristan ana nem bail agütsütsü atema telemtetba agibaji ita ana tashi mimshia liasü, aser iba osang ya tang ang jungkai adoker.

September 23, 2021 nu Faisalabad nung sessions court kati Mariam Lal aser Nawish Arooj na nem bail agütsü saka iba osangji mimshia liasü.

Pakistan nung Tsüngrem mezüngmeshiba ken o nung tai tonglokja alirtem kum aika tepuokdak ayur, ajisüaka tenabo melamela bail nung chiokogo.

Osangbener den jembidang attorney, Atif Jamil Paggan-i, "Tsüngrem mezüngmeshiba ken

o nung sessions court kati tang mezüng iba ama obendang agütsür. (Islam) Yimsü alia amangertemi timtem agütsü tsübuba agi bail agütsüba obendangji mapang talangka mimshia liasü," ta metetdaksü.

Taküm April 9 nu Faisalabad nung aliba Civil Hospital nung inyaker Khristan nurse ana- Lal aser Arooj nati Tsüngrem mezüngmeshiogo, ta tena nem tai tonglokja liasü.

Iba hospital nungji senior nurse, Rukhsana-i Lal dang hospital jara nung aliba stickers ji agizüka indokang ta tuyua liasü, ajioda Lal-i yamaji inyaker.

Ajisüaka Rukhsana-i Muslim nung külem staff purtem dang, Lal-i hospital jara nung Quran lai otem zülua aliba shizüka indok ta tai tongloktsü. Iba sülen hospital pharmacy nung inyaker, Waqas-i kotari agi Lal dak aiben atsüngba ajanga la mejungi yirua liasü.

Iba osang ayimsünga

prokshiba sülen Muslim nung tejashi nung Civil Hospital kima adenshia longkak aita liasü. Muslim nungertemisa Lal aputsü aser alenseta südaktsütsüla, ta takhangba agüja liasü.

Police-i iba dak sendakba nung FIR ka benok. FIR nungji Lal aser Arooj napronglai Pakistan nung blasphemery laws kubok Arrla 295-B nung aibelenogo, ta shia lir.

Osangbener den jembidang Paggan-i, "Tetsür anaprongla lendong majurutsüsa tesem ka nung lir. Court obendang ajanga tena pelar aser melung süngzükogo. Court-i maneni tena anema kuli magütsütsü imlar," ta metetdaksü.

Pakistan nung Islam yimsü amangertemi aiben mangyangtsü mesüra tesempa ajanga Tsüngrem mezüngmeshiba ozüng nung ajemdaker Khristantem nem tai tongloktsür.

China nung police-i pastor ka den Arogo züngsem ka apu

November 29, 2021: China kubok Taiyuan nung police-i Zion Reformed Church nung pastor, An Yankui den külemi Khristan ka densema apu; tenaprong tang tashi mechiok, ta International Christian Concern (ICC)-i metetdaksü.

Tamalen-a China ketdangsertemi pastor, An Yankui pua liasü. Taküm kum tetenzüklena ketdangsertemi pa puogo.

Pastor, An ya Early Rain Covenant Church aser Wang Yi den-a tesendaktep lir; iba Arogo ya ketdangsertemi melaba organisation nung register süa mali, ibayongji Shanxi Department of Ethnic & Religious Affairs, National Security Department aser Public Security Department-i An anema inyaker.

Taküm July ita nunga Zion Reformed Church kubok Fenyang campus nung inyaker

Khristan pongu pua liasü. 2020 kum nunga Arogo züngsemtem Kuala Lumpur, Malaysia nung Gospel & Culture Conference nung adenba sülen China-i meyipa aruba mapang nung police-i pua liasü.

Arogo züngsemtemji ozüng alema linük arrtsü adena ait, ta melung melemei China ketdangsertemi apu, saka parnok ajak ket nung Chinese passports liasü.

ANO GO ABEN TSÜNGREM DEN

Kodang Tsüngremi Tangartem Moatsür

Aser kodang pai pei sasa kanga shisa kaa benshi ta Sauli ajitet, pai pa tsübuseta noktak.

1 Samuel 18:15.

Tenükmeremji teraksatsüba mulungsentsü lir. Iba yagi ne taküm tangatetba raksatsür. Ozüng ter nung ocet ana nung Tsüngremi ibai aitsü. Saul chuba tenük meremba chuba ka liasü aser pa kümzüka mali asü. Israel nungeri Dawid tenüng asangba aser parnok pa tsütsü aoba angu. Israel nungeri Sauli inyakba mapatem motetta liasü, saka Tsüngremi Dawid ajanga takok timba agütsüba asoshi Dawid tenüng asang (1 Sam. 18:7). Parnok tsükchirtem akoktsü asoshi Tsüngremi tashi tuluba agütsüba asoshi pelatsü melen Sauli tenük merem aser Dawid tepsettsü merang.

Khristan taküm nung Tenükmeremji tesempatsü lir. Tsüngremi asenok pa chirtem kümdaksü. Asenok shinga Tsüngrem chir akümtsü temsüa mali asü, anungji Tsüngremtem pai moatsüba nung medemdangtsü menüngdak. Tenük meremji pei atema dang bilemba lir. Tenük meremji asenok tepela aoyar aser temulung asüba aidoktsür. Tenük meremji temulung merangdaksüra aser tenüngsang magütsüner. Tenükmeremji tangar asoshi Tsüngrem temoatsüji telatet kümdaksür aser asenok tali moatsür ta bilemdaksür.

Sauli Dawid dak kanga tenük merem aser nübur dangi timtem aruba pai mebilem. Pa tenük merem ajanga par kibong raksa.

Ne mulungjang mita liang! Tangari takok anguba nung na mepelai lira, kümdangang! Tenükmeremji ne mulungjang nung tarak tekedaksü. Iba yagi ne tepela maoyadang aser Tsüngremi ne mulung süa moatsü bilema aliba menokdangdang temulung meyipang. Kodang nai ne takok tangar takok den medemdangtsü bilemdir, Tsüngremi lemanng aisü nung na moatsüba bilemtetdaksü ta Tsüngrem dang asüngdangang.

Chin state nung sepaitemi ano Tenla ki ka rongdoktsüogo

November 29, 2021: metetdaksü.

Myanmar kubok Chin state nung sepaitemi maneni Arogotem anema inyaker, aser November 27 nüa Chin state kubok Thantlang jila nung sepaitemi St. Nicholas Tenla ki rongdoktsüogo.

Chin Human Rights Organization (CHRO)-i ashiba agi, Myanmar sepaitemi Thantlang jila nung November 26, 2021 nungi tenzüka November 28 tashi nung ki aika rongdoktsü.

Anogo ana tsüngda Thantlang Centenary Baptist Arogo Tenla ki densema ki 48 rongdoktsüogo. Taküm September ita nungi tenzüka tang tashi nung sepaitemi iba jila nung ki 300 dak tema rongdoktsüogo, ta CHRO-i metetdaksü.

August ita nungi November ita tashi nung Chin state nung Tenla ki 22 aser civilian ki 350 rongdoktsüogo, ta parnokisa

Khristan nütsüng timba aliba Chin state nung nüburtemi sepaitemi maneni sepaitemi mangyanga nüburtem anema inyaker.

Thantlang jila nungi nisung 10,000 dak tema jenshiogo.

Pope Francis densema Khristan lenirtemi Myanmar sepaitem dang, International inyakyim nung ajemdaker tekülem kitem aser kiojentembo meraksatsütsüla, ta mepishiogo.

Shan state nung tongti putir, Peter Hla-ia sepaitem dang Tenla kitem aser yimsü dak sendakba kiojentem meraksatsütsüla, ta mepishiogo.

Myanmar nung, talisa Kayah aser Chin state na nung nisung 130,000 shi jenshia Tenla kitem, convents aser camp balala nung jenoka lir.

OLONG PAITEP # 6012

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPILEN		LANGTSÜNGLEN	
1. Inyaker ajangtetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Reprangzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashioktsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

OLONG PAITEP # 6011 TELANGZÜBA

TIPILEN :		LANGTSÜNGLEN :	
2. Bangsemo, 6. Tiptem, 8. Jen,		1. Yipten, 3. Nüja, 4. Sangro, 5. Milen,	
9. Talila, 11. Aren, 12. Tzübo, 14. Alia,		7. Tulu, 10. Laza, 11. Aben, 12. Tiyong,	
16. Angati, 17. Odi, 18. Azü,		13. Ajizük, 14. Aitsü, 15. Tasa, 16. Aina.	
19. Sünglang.			



ALOKBA AROGO TENZÜKBA MAPA KA NUNG INYAKNÜA CANVASSING SENZÜR

- Alok** : Hai Deaconba kidangi ken arurako,
- Deacon** : Arung, arung, menang, kechi koda asu Alokba?
- Alok** : Deaconba nia na amai deacon mapa inyaknüraja, ni devotional sentep nunga sarasadema sütettsü, pastorba dena ainia otettsü aser ni gari-a lir, nenoki kechi mapa nungloktsüdir ajak inyaktettsü.
- Deacon** : Saka Alok nai miema yi-a ajemer, sali moko odang achir taji na Deacon mapa nungji tera tiktari lirja!
- Alok** : Hai temba, nia Home Evangelistic Committee nung danga inyaksü arogo menden dang shijangkoto?
- Home Evangelist:** Na o talangji nai shiranger timtemer kidangi sarasademi aodang mapang talanglang dang agitsüji na aruya ngur kibur tezü atangtsüji nabo meshemtsü alitsua no!
- Alok** : Süra nia nominating nung danga shimangja.
- Arogo** : Nominating nungji tebang temeli azüoka alirtem dang agirakoti.
- Alok** : Wah.....süra nibo Arogo tenzükba mapa nung masü Tsüngrem tenzükba mapa nung danga shimang.
- Arogopur** : Oh Alok!!

Lilir : Asangla.

AO OSHI ANGAZÜKDAK:
TANÜ ANGAZÜKTSÜBA OJANG

Lianung
 (n) anasatepa, tetsünga kangabo mali (close by)
 * Kütsüi ni **lianung** arur dang reprangtet.

Liasü
 (v) taoba mapang ali (was)
 * Tamalenbo asenok ya shiruru amai **liasü**.



NAI-A YA METETTER MA

HON (GOLD) TIMTIBA ADOKDAK: 2021

1. China	- 368.3 Tonnes
2. Russia	- 331.1 Tonnes
3. Australia	- 327.8 Tonnes
4. United States	- 190.2 Tonnes
5. Canada	- 170.6 Tonnes
6. Ghana	- 138.7 Tonnes
7. Brazil	- 107.0 Tonnes
8. Uzbekistan	- 101.6 Tonnes
9. Mexico	- 101.6 Tonnes
10. Indonesia	- 100.9 Tonnes



TANÜBO NAI LANGZÜANG

Q. Collins Dictionary-i ____ ya 'Word of the year 2021' ama sangdong.
 [A] Crypto-currency [B] Bitcoin
 [C] NFT [D] De-Fi

_____ (Taruba adok nung onoki langzüsü)

YASHI ADOK TELANGZÜBA: Military School of Draguignan, France

SUDOKU # 6053 TELANGZUBA # 6052

7	9		8	2	1		5	6	9	5	7	6	1	3	8	2	4
		4	9						2	4	8	7	5	9	3	1	6
		1	5			9		7	1	3	6	8	4	2	9	5	7
			7		9	5			3	6	2	4	8	1	5	7	9
4							7	9	7	9	5	3	2	6	4	8	1
	2			5		6	4	8	8	1	4	5	9	7	2	6	3
1						7	9		5	2	1	9	7	4	6	3	8
	7		4	9			3	2	6	8	9	1	3	5	7	4	2
5		9	2	1	7	8	6	4	4	7	3	2	6	8	1	9	5

OJANG LUTEP # 5609

- CHKEA :
- HIAS :
- AJUMNG :
- NAI :
- OKADA :
- SHJAIBA :
- UNNISG :
- NDE :
- JITEMBSÜ :
- SATAK :

OJANG LUTEP TELANGZÜBA # 5598

TESÜIBA MAPANGTEM KOMAKA MAJUNG YONGJIA TAJUNG INYAK TENZÜKTSÜ MENUA MALI

TAN HOPTA ATEMA - KOMA SÜLA ?

Q. Kohima nung Hornbill benjong amongtsü atema Kisama yim akümba ama, Mokochung district nunga yim ajunga adenshia sobaliba benjong amongdak yim tasen ka mesemtet nunga koma süla ?

Aluyimba ozüing asemprong agientsü atema bill ka agizük



New Delhi, November 29, 2021: Hombarnü asükwa mongpu Parliament tenzükba anogo nung Parliament kima Mahatma Gandhi kürakyanglu anasa Congress MP temi aluyimba ozüing tasen asem anema longkak aitba noksa nung angur.

New Delhi, Yimpoksüi/ November 29 (Agencies): Asükwa mongpu Parliament senden tenzükba anogo nung aluyimba ozüing tasen asemprongla agientsü atema benokba bill ka voice vote ajanga agizükogo.

Lok Sabha nung Union Agriculture Minister, Narendra Singh Tomar-i Farm Laws Repeal Bill 2021 benokba sülen Congress lenir, Adhir Ranjan Choudhury-i iba atema o lemtepsü takhangba agütsü saka Speaker, Om Birla-i memela.

Aluyimba dak sendakba ozüing asem- Farmers' Produce Trade & Commerce (Promotion and Facilitation) Act, 2020, Farmers (Empowerment and Protection) Agreement of Price Assurance, Farm Services Act, 2020 aser Essential Commodities (Amendment) Act, 2020 agientsü atema bill ka dang

benok aser opposition MP temi yimyim ayimba mapang voice vote ajanga iba bill agizüka liasü.

Mapang tatsüka dang lir Minister Tomar-i Raya Sabha nunga iba bill benok. Iba bill magizükdang

deputy chairman, Harivansh-i o jembitsü atema Opposition Lenir, Mallikarjun Kharge nem minute ana lemzüksü.

Kharge-i, tawa by election agiba asadanga aser state pongu nung kobi melii assembly elections agitsü aliba nung ajemdaker sorkari aluyimba ozüing asem agienogo, ta ashi.

Iba sülen Agriculture minister-i, aluyimba ozüing asem ya aluyimetem tajangzük ngudaktsütsü atema benok saka sorkari aluyimetem nem item ozüing indang junga mangatetdaksütetba atema sasar, ta ashi.

Paisa, sorkari dang masü saka opposition party temia item

ozüing agienüa liasü, anungji farm repeal bill nung o lemtepsü menüingdak, ta ashi.

Rajya Sabha nunga iba bill nung o melemtepi voice vote ajanga iba bill agizük.

Iba sülen Congress aser TMC nungi züingsem kar sabangleni oa iba bill nung o melemtepi agizükba anema yimyim ayima liasü.

Hombarnep Sonia Gandhi aser Rahul Gandhi na leniba nung Congress MP temi Parliament kima Mahatma Gandhi kürakyanglu anasa ozüing asem agienang, ta takhangba agüja liasü.

Parliament nung item ozüing asem agienba sülen aluyimetem lenir, Rakesh Tikait-i, "Iba ya (Farm Laws Repeal Bill, 2021 agizükba) ajanga longkak aitba mapang asür aluyimer 750 nem akhüm agütsür. MSP densema takhangba balala magizük tashi longkak aittsü," ta metetdaksü.

Coronavirus vaccine agia alirtem dak-a Omicron menatsüa akok

Hyderabad, November 29 (Agencies): Tawa putetba coronaviurs variant tasenba-B.1.1.529 (Omicron) ya monoclonal antibody therapy mesüra cocktail treatment agia manepsüa akok, ta mongintemi bilemer.

South Africa aser tanga linüktem nung putetba Omicron ya Delta variant dang nungi trokben agi taliba proktsüsa lir, ta mezüing asadanga ajanga bushitetogo.

India nung coronavirus

wave tanabuba mapang nung nisung aika dak Delta variant putet aser aika süogo, saka Delta variant ya monoclonal antibody treatment agi anepa liasü. Ajisüaka iba treatment agi Delta plus bo manep. Delta plus sülen tang Omicron variant prokba ya tebilemsü onük ka kümogo, kechiyong monoclonal antibody treatment ajanga iba variant-a manepsüa akok, ta mongintemi metetdaksü.

Genome sciences nung mongin, Scaria-i, Israel nung

B.1.1.529 (Omicron) agi shiranger kabo Covid-19 vaccine booster agir liasü, anungji vaccine agir alirtem dak-a iba variant menatsüa akok, ta metetdaksü.

Scaria-i twitter ajanga, "Taruba anogo ishika tsüingda sequences aser data jangjatsü. B.1.1.529 variants ya South Africa nung kanga bulua prokdar; tesüiba mapang tanga variants dang nungi iba variant ya kanga tekaraba prokdar," ta metetdaksü.



November 29, 2021 nü Lucknow nung aliba Eco Garden nung Sahara India nung inyaktertemi SEBI nem deposit sütsüba sen crore 24,000 meyipa agüjang, ta takhangba agüja longkak aitba noksa nung angur.

Mulungnen O



ASO: March 14, 1963

ASÜ: Nov. 24, 2021

Asür Nüingshichuchang Imchen

Obala alimar wadang temer, Kibuba dangi aoba mapang nungi lepku tembang tashi nung kija, kibong, lokti, arogo balala, nübu, shisatsü, sarasadem aser rongsen agi kwinakati ozü den yaritepa temeim mapa sayuogo nenok ajak dangi tsüingdong arua tepela melemsateptetaka iba zülu ajanga kanga pelaba lemsateper.

Tsüingremi nenok mapa tajungtem ajioka moajang ta ozü tamang sarasadem.

Temeim Chirnur aser Semchirtem.

Mulungnen O



ASO: 13/04/1957

ASÜ: 21/11/2021

Ozü Kumlong Baptist Arogo Sannüker Asür Rev. I. Lima Jamir, onok den küm 32 tashi sannüker tajung ka süa inyaka alidang Tsüingremer mapang ka tonga, 21st November 2021 nü onok santem toktsür, teti tatem makadak limai, Kibubai renemtsüba kidangi ogo. Iba ama tejashi tulu tia ka nung Arogopurtem sensena alidang, ABAM-i anir Arogotem, telok balala, kija aser kibongtemi onok den iba mangyim khuret bena sarasadema yariogo, nenok ajak dang ozü Kumlong Baptist Arogo-i pelaba lemsateper. Tsüingremi nenok ajak moajangma!

Kumlong Baptist Arogo

Parliament nung sorkari ajak langzüksü melunga lir: PM Modi



New Delhi, November 29 (Agencies): Hombarnü Ato kilonser, Narendra Modi-i, Parliament nung tasüingdanga ajak langzüksü sorkari melunga lir, ajisüaka Parliament senden akhümket wazüka ayutsüla, ta metetdaksü.

Parliament senden tenzüksü lia Modi-i, "Tasüingdanga ajak langzüksü sorkari melunga lir. Parliament nung tasüingdangbatem onoki aginer aser tesünep-a aginer. Sorkar anema mesüra sorkar mapatongtem anema adokba ola ajak onoki angatsü, saka Parliament akhümket aser Speaker menden akhümket wazüka ayutsüla," ta metetdaksü.

Ato kilonserisa Coronavirus

variant tasenba 'Omicron' atema tekümdangtsü metetdakja MP ajak dang kümdanga alitsü mepishia metetdaksü.

Parliament nung aluyimba ozüing tasen asem agientsü atema sorkari bill ka benoka liasü. Iba dak alia sorkari tan mongpu Parliament nung bill tasen 25 benoktsü. Item bill rongnung Personal Data Protection Bill, 2019, Narcotics Drug & Psychotic Substances Bill, Central Vigilance Commission (Amendment) Bill, Central Vigilance Commission (Amendment) Bill, Delhi Special Police Establishment (Amendment) Bill, Constitution (Scheduled Castes and Scheduled Tribes) Order (Amendment) Bill, High Court & Supreme Court Judges (Salaries and Conditions of Service) Amendment Bill, 2021, Pension Fund Regulatory Development Authority (Amendment) Bill, Emigration Bill, 2021 aser Trafficking of Persons (Prevention, Protection & Rehabilitation) Bill, 2021 densema lir.

Asükwa mongpu Parliament ya December 23 nü tembangtsü.



Tokyo nung aliba Haneda international airport nung Japan Airlines indang tayimtsütem anentena aliba noksa ka yangi angur. Alima tesem ajungalen coronavirus tabu tasenba jangjatetba mapang ka nung Japan-i bendanger shinga linüki maitdaksütsü, ta Hombarnü sangdonga liasü. Coronavirus sa sernung ano Omicron tabu ya South Africa nung mezüng jangjateta tang linük aikati arütsü shibanger.

Omicron mechi senzusempongtsü nokdangba agientsüla: Ramaphosa

Cape Town, Yimpoksüi/Nov. 29 (Agencies): Coronavirus variant tasenba, Omicron mechi South Africa aser kidanger linük nungi senzusempongterem nokdangba atema iba linük tiri aitsü.

Cyril Ramaphosa-i ashiba agi, iba maparen yaki pa kanga jashi, koba tim masü aser tangsa agientsüla.

Iba tenokdangba agütsürtem ya UK, EU aser US nungi alitsü.

Omicron ya "variant of concern" ta sangdonga lir. Iba variant putetli kanga junga asadanga mapang iba tashidak tanaben menatsü temelaba, ta nguteta liasü.

Kanga kera menatepa aoba COVID-19 variant tasenba ya ita tetenzüklen South Africa nung jangjatet aser World Health Organization (WHO) nem taoba Bodhbarnü osang agütsü.

Testüiba hopta ana tsünga South Africa kübok nütsüng timtiba aliba Gauteng province nung COVID-19 tashidak putetba timkaba iba variant ya lir aser cases ya province ajunga nung amai timba akumer, ta WHO ajanga ashi.

Hombarnü Japan-ia arütsü

nung tenokdangba tesashi agütsügo aser November 30 nü nungi tenzüka bendanger shinga linüki aittsü memelar.

Linük balalai arüsanga senzusemponger menokdangtsüla aser iba tashidak tali tejangjaba meteta aser scientific tsütsü nungi repranger mera agitsüla, ta WHO ajanga tekumdangtsü ashi. Ajisüaka anogo ishika tsünga iba variant tetsübu nung linük aikati tenokdangba balala benokogo.

"Alima nung region kar nung Omicron variant putetba sülen Africa dak rangloker senzusemponger nokdangba ya tim lenmang masü," ta WHO indang Africa director Matshidiso Moeti-i Deobarnü ashi.

Deobarnü jembiba mapang, senzusemponger nokdangtsü asoshi scientific tsütsü tamendak dak mali aser tim mesüi amshiba nung southern Africa achir, ta Ramaphosa-i ashi.

Tenokdangba agütsüba ajanga iba variant prokshia aoba nungi menokdangtetsü, ta pai ashi.

"Senzusempongba nung tenokdangba agütsüba ajanga

kongshia aliba linüktem indang rongsenketzüng ang tali akoksatsü aser tashidak wara nungi shia aruba nung tetsükdaksü ajurutsü," ta pai ashi.

Tenokdangba agüja aliba linüktem dang pai rongsenketzüng nung timtem majurudang tekeratiba nung iba telemtetba melenshitsu ajungshia liasü.

South Africa-i tenokdangba tasen magütsütsü saka inyaksangshir kar aser tesem kar atema vaccine agiba ya tongtipang kumdaksütsü asoshi jembishinütsü, ta Ramaphosa-i ashi.

Tang South Africa nung COVID-19 dak sendakba nung tenokdangba agüja alibaji nüburtem aidak tejak nembangtsü aser kilung nung nisung 750 dang adenshitetsü aser kima nung nisung 2,000 tashi adenshitetsü.

South Africa nung vaccine agi anünga mali aser Ramaphosa-i nüburtem dang vaccine agitsü ajungshi aser virus den raratsü lenmang tajungtibaji ibai lir, ta ashi.

Alima nung tangbo Omicron ya UK, Germany, Australia aser Israel linüktem nunga putetogo.

Pakistan nung nüburtemi police station ka rongtoktsü

Peshwar, Yimpoksüi/November 29 (Agencies): Tekolok meshidak nisung kati Islam indang temeshia kaket; Quran mezüngmeshiba atema iba nisung meshiba magütsüba sülen northwest Pakistan nung manger mesangwa tsünga nisung telok kati police station ka aser police post pezü rongtoktsügo, ta ketdangtsürtemi Hombarnü metetdaksü.

Iba lendong nung police ka danga miyiru. Iba tatalokba sülen Khyber Pakhtunkhwa province kübok Charsadda nung tensa azüoktsü atema sepaitem tali jaoka liasü, ta local officer Asif Khan-i ashi.

Social media nung lemsatepba video ka nung police station ka rong aliba sayuogo.

Khan-isa, tepuokdak yua alisang tepsetsü meranga saka

ketdangtsürtemi nokdang aser police temi pa tanga district kati anir ao, ta ashi. Ajisüaka pai iba nisung tenüng mesangdong aser ashiba agi, ketdangtsürtemi ken o maneni bushisüngdangdar aser temulung meleme bilemsang ya anogo ka tejakdang apu, ta metetdaksü.

Khan-i ashiba agi, police temi mezüngbo nüburtem nokdangtsü merang saka longkak aiter meyirejang aikati police station amak tenzüka sülen parnok jena ao. Paisa, longkak aiterem asüama nungi jenboa toktsütsü atema police temi tashiyim mamshi. Charsadda nung Hombarnü tashi nungbo tensa tajungba kümogo aser police temi iba tatalokba dak sendaka alirtem aputsü bushidar, ta pai ashi.

Tamangba yimsü mezüngmeshiba atema

Pakistan nung tasüba agi merenshir aser ken o tilateri nungia lendong tulu ataloker. International aser domestic rights group temi ashiba agi, tamangba yimsü dak sendakba nung aibelenba atema aitsüba ya aiben tanga tamangba yimsü amangertem amokmerentsü atema aser jurila manga ayangtsü atema amshiteper.

2017 küm Abdul Wali Khan University nung kaketshir telok kati külem kaketshir Mohammad Mashal maka tepset. Pai Facebook nung tamngba yimsü mezüngmeshia post asü ta aija pa tepset.

Islamabad nung Punjab governor ka 2011 küm pa tanüker kati khaset. Pai Khrista dak amanger tetsür ka tenüng agi Aasia Bibi pusemba sülen pa khaset.

Omicron variant mechi Japan-i bendanger shinga marudaksütsü

Tokyo, Yimpoksüi/Nov. 29 (Agencies): Japan linüki aiter nem tenokdangba balala agüja aliba ajemer hopta ishika lir coronavirus tabu tasenba, Omicron poktetba sülen linük balala nungi bendanger shinga marudaksütsü, ta iba linük ajanga sangdong.

"November 30 nungi tenzüka aliba tesem balala nungi bendanger (tasen) aitba onoki nokdangtsü aser iba mera ya Mongulbarnü nungi tenzüksü," ta Ato Kilonser Fumio Kishida-i osangbener dang ashi.

Hopta tatemlen Japan-i South Africa aser iba region nung linük ti nungi aruba nüburtem asoshi tenokdangba tesashiba agüja parnok ya sorkari shimteta aliba tesem nung anogo ter quarantine asütsü metetdaksü.

Hombarnü iba osang sangdongba tetetzü, mapang tatsüka atema shishilempatsü arur, bendanger kaketshir aser mapa inyaker atema ita

tetenzüklen arütsü nung talenba tera sala aliba tanaben alenshir.

Coronavirus tashidak wara agi alima ajunga asünga mapang iba linük nung iba tashidak agi asür nisung 18,300 shi dang liasü saka lockdown tesashi mebenok. Nütsüng yongsük shilem 76.5 shi vaccine dose anaprong agiogo.

South Africa nung research agirtemi taoba hopta coronavirus sernung variant tasenba, Omicron ngutetba sülen linük aikati arütsü shibang tenzükgogo.

Iba variant tasenba indang ajakbo memetet, saka Israel nungi Morocco tashi, United Kingdom aser Singapore linüktem nung tenokdangba balala agütsügo.

Iba variant ya linük aika nung puteta lir, anungji arütsü shibangba nung tajangzük kangabo malitsü, anungji arütsü lapoka ayutsüla, ta World Health Organization (WHO) ajanga ashir.

Czech tir-i PM asütsü Milos Zeman Petr Fiala shimogo



Prague, Yimpoksüi/November 29 (Agencies): Czech tir Milos Zeman-i Deobarnü centre-right alliance lenir Petr Fiala, Ato Kilonser asütsü shimogo. Covid-19 tashidak potetba sülen pai iba sentong ya plexiglass cubicle ka nungi agia liasü.

Fiala lenisüba nung centre aser centre-right opposition party pongui October ita election akok. Parnoki taoba PM Andrej Babis aser pa den longjemer alirtem tsükdakja liasü.

Sorkar tasenba yagi coronavirus asendenshir prokshia aoba azüoktsü atema inyaksü. Sorkar kümtetba party temisa, parnoki sentsü tajemba kümdaksütsü atema 2022 state budget dena inyaksütsü sentong lir, ta shiogo.

"Sorkar tasenba jakdang tetsükdaksü aika lir. Ni iba sorkar ya tarutsü atema temelenshi bener arutsüba sorkar ka südaksüner," ta Fiala-i news conference ka nung ashi. Paisa, cabinet minister tem December ita teyongtsü tashi

nungbo shimtsü imlar, ta ashi.

Linük nung Covid-19 tashidak timba poteta aoba mapang ka nung ato Kilonserisa nüburtem dang Covid-19 vaccine agitsü ajungshiba den medical staff tem nem parnok mapa tajung asoshi tenüngsang agüja liasü.

Czech nunger shilem 58.5 dang Covid vaccine agia lir aser European Union indang average bo 65.8% lir, ta European Centre for Disease Prevention and Control-i ashi.

Tir Zeman dak coronavirus tashidak potetba sülen pai PM mapa nung aniokba sentong ya plexiglass cubicle ka nungi agia liasü. Zeman shiba medic kati meiner wheelchair ka nung aru, pa tanga tashidak agi mozükidang hopta trok amungba sülen Covid tashidak mena liasü.

Czech Republic nung sorkari Covid tashidak prokshia meyoktsü atema Brehostibarnü tenokdangba tesashi agütsügo, kong Christmas atema shishilembadak shibanga ayutsüba dena densema lir.

MULUNGNEŊ O

ASO:
10.06.1938ASÜ:
20.11.21

Asür Mr. Chubamaong Imchen (Mangmetong)

Onoki teti meima aliba kinungbo, tsürabur aser adianu asür Mr. Chubamaong Imchen (Mangmetong) shiranga aliba mapang nungi tasü nü tashi nenok temeimertem shirnokisa timtem aser asükhu mangyim jashi mapang nung nenok tamang sarasadem, nübu, rongsen aser shisatsü agi yaritepa ozü mulungjang nung teti alitsü. Nenok temeim aser aria bilemba mapatem asoshi kanga pelaba lemsateper.

Tsüngremi nenok taküm mapa maneni moajangma.

Temeim Kinungtsü, Jala, Jabaso,
Kinunger, Semchir aser Anükapang.

Office of the

Aoli Pongen Mungdang

H.Q. Mokokchung: 798601: Nagaland

SANGDONGER

Aoli Pongen Mungdang mendenti ajanga osang ka Aoli Pongen sanger ajak dangi sangdonger. Mungdang ketdangpurtem aser Mangmetong Pongen Unit 09.11.2021 anogo külem mensem ka mena koba Aoli Pongen Mungdang Mangmetong yimdam 2020 küm alitsüba liasü, saka iba mungdang tensa majungba ajanga melitet nung 2022 küm tatemlen iba Mungdang ya alitsü lemtetba metetdaksür.

Sd/-
Sakuwati
President, APMSd/-
Kilenrangba
Secretary, APM

BJP State Minority Morcha pur senden menogo

Dimapur, Yimpoksüi/ November 29, 2021 (TYO): President, Deep Kumar akhünnung, Minority Morcha BJP Nagaland-i 2buba State Executive Meeting ayonga agiogo, kong Zaveyi Kezo & Tokuho Suhoi Neho, State indang Secretary-cum-Minority Morcha Incharge aser Dimapur District President na alakteta tejaoker ama iba senden nung dena liasü, ta sangdong ajanga Ajay Sethi, State VP & Media Convenor, Minority Morcha BJP Nagaland-i metetdaksü.

Iba senden ya Deobarnü (28.11.2021) Rotary Club, Dimapur nung Convenor Brij Kishore Rai, State Vice-President ajanga ayongzük. Kasa senden nung Naresh Sethi Co-Convenor liasü.

Deep Kumar-i iba senden nung teshimtet nübutem aser tejaokertem pelashishia agizük aser party indang sentongtem takok angutsü asoshi nungitta yariba atema pelaba metetdaksü.

Kumar-i tawa BJP Minority Morcha National Executive Meeting atema Delhi semdangba indang züngsemtem dang metetdaksüba dak alia, December ita BJP indang National Media Convenors Meet

nung adentsü atema State Media Convenors' dang Delhi aotsü metetdaksü liasü.

Iba sentong nung meden, General Secretary Mustafa Ahmed Talukdar-i sarasademba sülen, General Secretary Roshan Kumar Tamang-i, telok dang tesüiba ita trok tashi Morcha indang maparen/inakyim 80 metetdaksü.

General Secretary Sahid Hussain-i Kohima District maparen 16 indang report agütsü. Iba sülen President Prakash Chhetri ajanga Dimapur District - maparen 55 indang report agütsü aser Mon District report ya President Johny Rai ajanga agütsü liasü.

Anogomung aser benjungmung balala achaayanga agiba/amungba dak alia, Covid-19 mapang Morcha züngsemtemi kanga danga meranga nüburtem yariogo, ta sangdong nung shia lir.

BJP indang Dimapur District President, Suhoi-i, tawa pa nem Tir menden agütsüba atema State BJP dang pelaba metetdaksü aser telok maparen ajak nung nungitta yaritsü asoshi Morcha dang nangzuka liasü.

Iba sentong nung, alakteta tejaoker, Kezo-ia jembia liasü aser

tangar dang tatishitsü asütsüsa mapa tajung inyakba atema pai Morcha dang pelaba metetdaksü; aser State BJP aser Morcha tsüngda tesendaktep tajungba yanglutsü asoshi Kezo-i nungitta yaritsü nangzükogo.

Kezo-i, electoral roll nung minority tem anioktsü aser party nung vote timba angutsü asoshi maparen ajanga nung BJP Dimapur District President den amalitepa inyaksü atema pai züngsemtem ajungshia liasü.

Linük ajangzüktsü mechi tawa 'farm law' asem meyipa agiba atema Ato Kilonser, Narendra Modi dang pelaba temaitsü sayua Morcha indang State Vice-President, Ajay Sethi-i, 'bangzüng' asem zünga liasü.

Maneni, BJP Minority Morcha indang National Executive ama inyaksü asoshi state BJP President ajanga Morcha züngsem rongnung ka shimtsü asoshi teloki bangzüng ka renema liasü.

State Vice-President Ravindarjit S. Panesar aser State Executive Member Naresh Sethi napronglai iba bangzüng nungitta liasü aser teloki agizüktsü lemtet.

Iba sentong tembanga Convenor Brij Kishore Rai-i tepela anküp o jembia aser State Secretary Anita Roychowdhury-i anir teloki linük naklo ken aten. Sentong temer sülen, telok chiyongba mapang agitsü atema Morcha indang State Secretary Sanjay Dey ajanga achaayanga liasü.

Iba sentong takok ngua agiba atema shilem agirtem aser alakteta tejaokertem den BJP Phek District General Secretary dang pelaba shisemer, ta kasa sangdong ajanga metetdaksü.

North East Christian University-i sentong ka ayongzük

Kohima, Yimpoksüi/ November 29, 2021 (TYO): Kohima Education Society (KES) den North East Christian University (NECU) longjemer Honibarnü (27.11.2021) GGPNL judges aser Naga Scholars tsüngda shisadokten sentong ka ayongzük. Iba sentong ya "Policy Making in North East India" omen nung ajemdaker agia liasü, ta sangdong ajanga metetdaksü.

Iba sentong nung Prof. Abu NS Ahmed (Director Research, Centre for Development and Peace Studies, Guwahati), Dr. Easterine Kire (nüngtugu writer aser poet) aser Dr. Vikas Kumar (Associate Professor of Economics, Azim Premji University, Bengaluru) nungeri jembia liasü. Iba sentong tenzuka, Rev. Dr. Yiepetsu Wezah (Auxiliary Secretary, Bible society of India, Dimapur)-i sarasadem aser Prof. Darlando Khathing, Vice-Chancellor (NECU)-i telok pela agizük.

Mezüng session nung, Prof. Abu NS Ahmed-i, 'Look/Act East Policy with special emphasis on Surface Connectivity' nung ajemdaker jembio, kong India indang 'Act East Policy'

HANDICRAFT THEMATIC EXHIBITION

Kisama Heritage Village, Kohima

1st-10th December

Featured Products

- Eri, Muga, Tussar and Mulberry Silk Textiles
- Paper Mache
- Textiles (Loinloom)
- Banana Fiber Products
- Dolls & Toys
- Beads Craft
- Embroidered & Crocheted Products
- Jute Craft
- Black Pottery Products
- Wood wares
- Candles
- Cane & Bamboo
- Fashion Jewellery & Accessories

Taekwondo asayamung nung Nagaland team-i medal 18 angu



Kohima, Yimpoksüi/ November 29 (TYO): Indo-Nepal International taekwondo championship nung Nagaland team-i medal 18 (9 Gold, 7 Silver aser 2 bronze medals) nguogo. Talkatora Stadium, New Delhi nung anogo ana asayaba asayamung ya Deobarnü nikongtsütsü tembanga liasü.

Iba tetoktepba nung pewee, sub-junior, cadet, junior, senior category nung Taekwondo Sports Academy nungi tebur 20-i shilem agia liasü.

Iba asayamung Nepal Taekwondo Association-i medal 29 (8 gold, 12 silver aser 9 bronze) ngua parnok temaba jenjang nung liasü aser tanabuba jenjang medal 18 (9 gold, 7 silver and 2 bronze) ngua Nagaland Taekwondo Academy liasü. Karnataka Taekwondo Academy-i medal 11 (7 gold, 1 silver aser 3 bronze) ngua parnok tasembuba jenjang nung liasü. Iba asayamung nung academy balala nungi team 38-i shilem agia liasü.

Iba asayamung nung Nagaland team, State Taekwondo

Coach, Department of Youth Resources and Sports Visabiu Peseyie aser team manager ama Keneingulie Khezhe na lenisüba nung shilem agi.

Covid-19 wara poktetba ajanga mapang talanga asayamungtem nung shilem magiteti arur academy asayartemi takok tajung anguba atema kanga pelaba team coach Peseyie-i lemsatop. Ajisüaka pai ashiba agi, tarutsü nung timba koktettsü atema asayartem tali temerengba inyaktüsü nungdaker.

Paisa, asayamung balala nung shilem agiba ajanga kaketshirtem tali angazütsü ta bilemba lemsatopba den YRS department-i maneni teyari agüja tarutsü nunga maongka tajung nguyonga aotsü imlaba lemsatopba liasü.

RESULTS

- Gold Medalist:-**
1. Pauninglungbe Nandang (Under 25-27 Kg Pee wee)
 2. P.Athongti (Under 27-29kg Pee wee)
 3. Lensethong (Under 26-27 Sub-Junior)

4. Manong A.T Konyak (Under -33 kg Cadet)
5. Lhuvosayi Vasa (Under 33-37 Cadet)
6. Thongti Thonger (Under 37-41 Cadet)
7. K.Yimkiuong (Under 45-49 Kg Cadet)
8. Hinglakpo (Under 45 Kg Junior)
9. Keyinchigongbe Hega (Under 54 Kg Senior)

Silver medalist:-

1. Pauziechangbe Herie (Under 27-29 Kg Pee wee)
2. Manhei Konyak (Under 33-37 Kg Cadet)
3. Longshe (Under 37-41 Kg Cadet)
4. Lungkan Phom (Under 41-45 Kg Cadet)
5. N.Tenloi Phom (Under 45 Kg Junior)
6. Neikhozo Naprantsu (Under 45-48Kg Junior)
7. T.Kiutsu (Under 48-51Kg Junior)

Bronze Medalist:-

1. Wongpanthong.A (Under 33-37Kg Cadet)
2. Nnumhei (Under 48-51 Kg Junior)

Noklak nung Relay race tetoktepba ayongzüka asaya

Dimapur, Yimpoksüi/ November 29 (TYO): Noklak nung November 29 nü Inter Sector Relay Race tetoktepba ka ayongzüka asayaogo. Iba tetoktepba ya Clean Electoral Rolls omen nung ajemdaker District Election Office, Noklak-i ayongzüka asayaogo.

Sempet agütsüba sentong nung Deputy Commissioner aser District Election Officer Noklak, HiazuMeru-i, Election Commission of India-i electoral inyakyim nung kecha tebandang makai ajak nem shilem agitdaksütsü kanga tongtibangsa inyakdar, ta ashi.

Special summary revision dak sendakba nung Meru-i, iba sentong ya district nung election inyakyim kecha takar meketi benoka inyaktüsü atema

tangazükba agütsütsü nükjidong nung Systematic Voters Education aser Electoral Participation (SVEEP) kübok ayongzüka, ta ashi.

Maneni Deputy Commissioner-i, tetoktepba nung takok angurtem aser shilem agirtem ajak nem tenüngsang agütsü aser kiyong balala chairmen temi election department den teka amteper inyakba aser pei kiyong kanga junga achaayangba atema kanga pelaba lemsatopba liasü.

Inter Sector Relay Race tetoktepba ya DC. Leng sector-i akok aser tanabuba aser tasembuba jenjang nung Danlepdong aser Koungao Sectors liasü. Takokertem nem senpet aser kuli kaket tajung agütsüogo.

Longleng nung 1buba inter Dept. asayamung ayongzüka asayadar

Dimapur, Yimpoksüi/ November 29 (TYO): Officers club Longleng-i ayongzüka mezüngbuba first inter department badminton aser carom asayamung tanü, November 29 nü nungi tenzüka multipurpose building nung asayadaki. Iba asayamung ya December 1 nü tashi asayatsü. Asayamung lapokba sentong nung Pongshi Phom, class-1 contractor alakteta jaoker liasü.

Sentong nung A. Pongshi Phom-i, lokti tensendaktep atema sabang tajung ka agütsüba atema officers club, Longleng ngutetertem aser executive züngsemtem nem tenüngsang agütsü. Paisa, iba

asayamung ta temoatsü aser jila nung aliba lanurtem atema tenük lapokba asayamung ka asütsü imlaba lemsatop.

Kasa mapang nung Deputy Commissioner Longleng, M. Shayung Phom-i, asayamung nung shilem agiba atema department aser HoD tem dang kanga pelaba lemsatopba den wara pokteter aliba ajanga Officers' Club-i taoba küm iba asayamung ayongzüka masayatet, ta ashi.

Sentong nung ADC aser Officers' Club Longleng tir, D. Robin-i lokti pela agizükba o jembu. Sentong ya EAC, Chingmei lenisüba nung agi aser William Kuarinta-i ken ka aten.

Zhaleo-i CSU Volleyball asayamung tenzüksü

Medziphema, Yimpoksüi/ November 29 (TYO): Chakhroma Students Union-i ayongzüka 1buba Volleyball Running Trophy November 29 nü Advisor, Sericulture, Excuse and Minority Affairs, Nagaland, Zhaleo Rio, IAS-i (Retd.) Medziphema Local Ground nung tenzüksüogo. Iba asayamung nung tetsür aser tebur naprongla asayatsü. Asayamung nung team ajak senteper team 30 tokteptsü kong tetsür team 10 densema lir.

Sentong nung alakteta jaoker ama o jembiba mapang Zhaleo Rio-i, Volleyball aser badminton ya state nung kanga nüngtugu lir aser CSU-ia ka ayongzüko, saka tanga asayamung dang nungi tebandang kaji, CSU-i asür Vitsizolie Nagi bilemteta iba asayamung ayongzüko, ta ashi. Pai, sentepa alir ajak dang pai takok angubattem bilemtetsü aser tanü aser tarutsü nunga pa tsüngsü nung anidaksü ayongzüka.

Rio-i, field, department mesera discipline ajak nung Chakhroma region nongita yaritsü mapang tongogo, ta ashi. Paisa, asayamung nung shilem agirtem dang physical exercise, fitness aser saisapong dak sendaka aliba inyakyim tongtibangtem indang shia ajungshi.

Asayar kati pei sempet dak ajemdaker asaya tapet ka shimtsü kanga tongtibang ta shia pai, asaya nung takok tajung agnatsü atema training tapet aser meranga agitsüji kanga tongtibang, ajita asünung dang asayar kati temaba jenjang tongteta pei aliba tesem, district, state, national aser international jenjang nung asayatetsü, ta ashi.

Rio-i, lanurtemi asayatsüla saka mapang intoktsüba atem aser hobby ama dang masü saka jenjang ajak nung takok angutsü atema profession ka ama asayatsüla, ta ashi. Pai, asaya ajanga taküm jenjang yanglushitsü asoshi

yimyayimpong shidak bentshia bendanga agütsü inyaktüsüji kanga tongtibang ta ashi.

Lanurtemi parnoki jangraba asaya tapet ka shima noklang nung noklang bendanga agüja asayatsüla ta ashiba den tekübokba jenjang nungi temaba jenjang tashi training agitsüji kodang tongtibang iba indang pai lemsatop. "Temaba jenjang tokgtetsü atema, discipline, chiyongtsü, anogoshia inyakyim, diet, exercise amala kanga tenüngdaksü," ta pai ashi. Asayartemi anogo nung ghonda 9 dak tema training agir ta shia bendanga agütsüba aser discipline-ji asayaba moapu telung aser tema naprongla nung kanga tongtibang ta pai ashi.

Maneni Rio-i, lenirtem, tesayurtem, coach tem, ketdangsurtem aser tongtibangsa kibong aser tsürapurtem dang lanurtem nem takok tashi teyari agütsütsü ayongzüka den state sorkar aser talisa sports department-i,

asayartem ajangzükdaksütsü atema sports policy balala benoka inyakdar, ta ashi.

Pai asayamung nung shilem agia aliba asayar tsürapurtem dang pei tanurtem nem mapang peria agüja parnok asaya reprangtsü, parnok pusema ajungshitsü aser anitetsü ayongzüka liasü.

Chakhroma Public Organisation kübok saisapong tentet balaka tenteta maliba mapang ka nung Rio-i, CPO kübok iba amala lokti tentet ka tentetba ajanga iba tesem nung aliba asayartem nüngdak peritsütsü, ta ashi.

Sentong tetenzüki Zhaleo asayamung wako atsüketsü. Iba sentong ya Er. Zhasakholie Kehie, Advisor, CSU lenisüba nung agi aser CRCM pastor Seyievikho Sothu-i temoatsü

meshizüka sarasadema liasü. Sentong nungsa CSU tir V. Akieto Khro lokti pela agizükba o jembu, Rokosino Khro aser Neizovonuo nati ken kaka aten, CPO tir Vichütolie Mere-i, asür Vitsizolie Nagi'er kinungertem tenüng nung o tatsüka jembu aser Nagi taküm otsü tatsü agi lemsatopba liasü.

Maneni CSU, General Secretary Seyielhousa Keyho-i achaayangba asayartem tenangzüktepba agi aser Visako Rino o Medosenu Viswentso nati sentong ania liasü. Anogo ana asayatsü aliba asayamung ya November 30 nü tembangtsü aser asayamung shibangba sentong nung Zhato Kimho, Vice President, CPO & President, Chakhroma Angami Kuda Union alakteta jaoker asütsü.

BILEMDANGANG

"Nü takok dang nungibo nai temeim sayuba tali bilemtetsü."